

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama ("Službeni glasnik BiH", broj 87/12), Državna regulatorna komisija za električnu energiju, na sjednici održanoj 16. oktobra 2014. godine, donijela je

## **ODLUKU**

### **O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM**

1. Izdaje se licenca društvu "COMSAR ENERGY TRADING" d.o.o. Banja Luka za obavljanje djelatnosti međunarodne trgovine električnom energijom.
2. Licenca iz tačke 1. ove odluke izdaje se za period od 1. novembra 2014. godine do 21. maja 2019. godine.
3. Sastavni dio Odluke je licenca za obavljanje djelatnosti međunarodne trgovine električnom energijom koja sadrži Uvjete za korištenje licence.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

### *Obrazloženje*

"COMSAR ENERGY TRADING" d.o.o. Banja Luka (u daljnjem tekstu: podnosilac zahtjeva) podnio je Državnoj regulatornoj komisiji za električnu energiju (u daljnjem tekstu: DERK) zahtjev za izdavanje licence za obavljanje djelatnosti međunarodne trgovine, zaprimljen pod brojem: 05-28-12-217/14 od 26. maja 2014. godine.

Shodno članu 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) za aktivnost međunarodne trgovine električnom energijom potrebna je licenca DERK-a, a podnosilac zahtjeva je dužan zadovoljiti uvjete i kriterije za dobivanje licence koje svojim pravilima i propisima odredi DERK.

Zahtjev je podniet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnieti uz zahtjev ili predloženi naknadno na zahtjev DERK-a, omogućili DERK-u da razumije, razmotri i odluči o podnietom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj: 05-28-12-217-4/14 od 24. jula 2014. godine.

Po pregledu i provjeri svih formalnih elemenata zahtjeva DERK je najprije, u skladu sa obavezom iz člana 10. Pravilnika o licencama, 26. jula 2014. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 9. augusta 2014. godine za dostavljanje komentara javnosti na podnieti zahtjev za izdavanje licence.

DERK je konstatirao da nisu dostavljani komentari javnosti u vezi podnietog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

DERK je izvršio provjeru podataka, dokumenata i informacija priloženih uz zahtjev i utvrdio da isti svjedoče o tehničkim, pravnim i finansijskim mogućnostima podnosioca zahtjeva da

ispuni sve kriterije, uvjete i standarde propisane zakonom, pravilima i propisima DERK-a za dodjelu licence za obavljanje međunarodne trgovine.

Nadalje, podnosilac zahtjeva je bio vlasnik privremene licence za obavljanje djelatnosti međunarodne trgovine električnom energijom, upisane u Registar licenci kod ove Komisije pod registracijskim brojem: 05-28-12-148-21/12 od 25. juna 2012. godine, čije je trajanje isteklo 30. juna 2014. godine.

Iako podnosilac zahtjeva nije iskoristio svoje pravo na obnovu licence utvrđeno odredbama člana 54. Pravilnika o licencama, svoju namjeru da djelatnost međunarodne trgovine električnom energijom započne ponovno obavljati, izrazio je podnošenjem novog zahtjeva za izdavanje licence, te je DERK, razmatrajući podneseni zahtjev, imao u vidu da je podnosilac zahtjeva, u vrijeme važenja ranije izdate privremene licence, permanentno potvrđivao svoje tehničke, pravne i finansijske mogućnosti i pružao dokaze da ima osigurane resurse, organizirane uvjete i utvrđene profesionalne standarde da nastavi obavljati istu djelatnost.

Navedeno je dala osnova DERK-u da pristupi izdavanju licence, odnosno pripremi Nacrt uvjeta za korištenje licence za obavljanje djelatnosti međunarodne trgovine električnom energijom.

Ovaj dokument je od 4. septembra 2014. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 12. septembra 2014. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenata na internet stranici DERK-a.

Kako su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a, broj: 05-28-12-217-15/14 od 23. septembra 2014. godine. U ostavljenom roku do 1. oktobra 2014. godine, podnosilac zahtjeva se nije izjasnio o dostavljenom prijedlogu odluke što je dala osnova za zaključak da se prijedlog smatra sačinjenim u skladu sa Zakonom o prijenosu, regulatoru i operatoru sistema električne energije u Bosni i Hercegovini i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući i dokaz da je podnosilac zahtjeva prethodno ishodio dozvolu Regulatorne komisije za energetiku Republike Srpske za obavljanje djelatnosti trgovine i snabdijevanja električnom energijom na teritoriji Bosne i Hercegovine, registracijski broj: 01-98-04-1/40-1/14 od 21. maja 2014. godine, koja vrijedi do 21. maja 2019. godine, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-12-217-16/14

16. oktobra 2014. godine

Tuzla

Predsjedavajući Komisije

Nikola Pejić